

Otvoren novi objekat Klinike za psihijatriju

Uz prisustvo brojnih zvanica i uposlenika JZU UKC Tuzla 25.11.2008. godine svečano je otvoren novi objekat Klinike za psihijatriju UKC Tuzla u Solini.

Preseljenjem u novi objekat Klinika za psihijatriju dobila je nove mogućnosti za razvoj i unaprijeđenje usluga u oblasti mentalnog zdravlja. Adaptacija objekta, bivše kasarne Mirsad Fidahić u Solini

urađena je po visokim standardima koje zahtijeva ova struka, čime su stvoreni dobri uslovi za funkcionisanje i rad.



Prof.dr. med.sci. Enver Zerem, direktor za naučno-istraživački rad i edukaciju Univerzitetskog kliničkog centra Tuzla u ime menadžmenta izrazio je zadovoljstvo što su brojni gosti, zvanice iz javnog i političkog života, uvaženi predstavnici federalnih institucija bili na svečanosti otvaranja novog objekta Klinike koja je zaslužila uslove kakvi su u novom prostoru.

„Univerzitetski klinički centar Tuzla uz veliki entuzijazam ulaže napore u nastojanju da uspjesima na stručnom i naučnom planu bude prepoznatljiv i postane lider ne samo u BiH nego i u regionu. Ja danas sa ponosom mogu reći da smo mi u više medicinskih disciplina najznačajnija zdravstvena ustanova u našoj zemlji. Mi smo, također, ubjedljivo prva naučna institucija koja objavljuje na području biomedicine najveći broj naučnih radova u relevantnim stručnim časopisima. Rijetke su oblasti i u struci i u nauci koje su ostale malim centrima i koje im daju priliku da naprave iskorak u stručnom i naučnom pogledu, srazmjeran njihovim realnim mogućnostima. Takva je upravo psihijatrija. Događaji s kraja prošlog vijeka ostavili su velike posljedice na psihičko zdravlje naših ljudi. Ti događaji uzrokovali su potrebu za poboljšanjem stručnog rada u oblasti psihijatrije ali istovremeno dale priliku našim ekspertima, iz te oblasti, da se iskažu“, kazao je povom prilikom prof.dr. Zerem.

Zahvalio je Vladi Federacije BiH, i Ministarstvu odbrane BiH na razumjevanju i ustupanju ovog objekta za potrebe Klinike za psihijatriju i osnivaču Ustanove, Skupštini Tuzlanskog kantona, koja je uz Zavod zdravstvenog osiguranja obezbijedila sredstva za njegovu adaptaciju.

Od 1954.godine kada je onovana kao Neuropsihijatrijsko odjeljenje Opšte bolnice u Tuzli Klinika za psihijatriju bila je smještena na nekoliko lokacija. O putu koji je prešla do danas, kada ima izvanredne prostore koji otvaraju nove



mnogučnoti razvoja i primjenu savremenih pristupa u psihijatriji uz komfor za pacijente govorio je **prof. dr Izet Pajević, direktor Klinike za psihijatriju.**

„ Začetak Klinike za Psihijatriju predstavlja Neuropsihijatrijsko odjeljenje Opšte bolnice u Tuzli osnovano 1954. godine u zgradi nekadašnjeg Internog odjeljenja u Kojšinu. Dvije godine nakon toga Odjeljenje je premješteno u potkrovlje zgrade bolnice u Kreki. Tu su 1964. godine formirana dva zasebna odsjeka: Odsjek za psihijatriju koji je zauzeo cijelo potkrovlje i Odsjek za neurologiju smješten na prvi sprat.

T o k o m 1 9 7 0 . g o d i n e Neuropsihijatrijsko odjeljenje je integrisano u okvire Službe za nervne i duševne bolesti a 1980. godine,

stasanjem Medicinskog fakulteta Univerziteta u Tuzli, prerasta u Neuropsihijatrijsku kliniku. Tokom 1992. godine ona je reorganizovana u dvije zasebne klinike: Psihijatrijsku i Neurološku. Ratne prilike uvjetuju proširenje Psihijatrijske klinike na cijeli prostor bolničke zgrade u Kreki i na jedno istureno odjeljenje u Kojšinu. Nakon požara 1996. godine, dio Psihijatrijske klinike je izmješten u prizemlje Infektivne klinike tako da je do 1999. Klinika radila na tri udaljene lokacije (Gradini, Kojšinu i Kreki). Poslije renoviranja matične zgrade 1999. godine Klinika je pet godina bila locirana na dva punkta (na Gradini i u Kreki) a 2005. objedinjena je u bolničkim kapacitetima u Kreki odakle je, konačno, preseljena u ovaj novi prostor.“



Danas je Klinika za psihijatriju u Tuzli respektabilna i dobro organizovana ustanova čiji je rad koncipiran u skladu sa savremenim standardima važećim u ovoj oblasti, rekao je prof. Pajević i dodao: " Po tome smo prepoznatljivi kako u BiH tako i u inostranstvu. Prostor u kome se sada nalazimo pruža visok standard od preko 25 m² korisne površine po jednom pacijentu, smirujuće okruženje, urbani ambijent u pozadini, tišinu i čisti zrak. On je inspirativan i perspektivan za nastavak našeg puta u dostizanje najviših standarda u brizi za mentalno zdravlje."

Organizaciono Kliniku čini šest Odjeljenja sa ukupno 70 kreveta i Dnevna bolnica sa 28 mjesta. Zaposlenih ima 69 od čega 17 ljekara specijalista i 41 medicinska sestara/tehničar. Tri doktora medicinskih nauka (2 vanredna profesora i 1 docent) i 5 magistara predstavljaju solidnu akademsku osnovu za dalji razvoj naučno-istraživačkog i edukativnog rada u oblasti kliničke psihijatrije i mentalnog zdravlja općenito.

Podršku razvojnim projektima u UKC Tuzla kontinuirano pruža Ministarstvo zdravstva Tuzlanskog kantona, u ime koga se na svečanosti otvaranja novog objekta Klinike za psihijatriju prisutnima obratio ministar zdravstva u Vladi Tuzlanskog kantona, dr. Asim Musić, riječima: „ Raduje činjenica da je ovo još jedan korak u stvaranju boljih uslova za naše pacijente i da je i Klinika za psihijatriju dobila priliku za svoj daljni napredak.



„Mislim da je objekat ustupljen u prave svrhe, obzirom na njegovu lokaciju, zbog prirode bolesti koja se na ovoj Klinici liječi. Zbog toga još jednom izražavam zahvalnost Ministarstvu odbrane i oružanim snagama na razumjevanju” rekao je.

Da UKC Tuzla ide uvijek korak ispred i da je lider u mnogim oblastima medicine u BiH potvrdio je i prim.dr.Safet Omerović, ministar zdravstva u Vladi Federacije BiH.



„ Tuzlanski kanton je uvijek imao senzitivnosti za one kojima je pomoć bila neophodna, a iskoraci koje UKC Tuzla čini u mnogim medicinskim disciplinama dobar su putokaz kolektivu rada u zdravstvu. Drago mi je da je UKC Tuzla prepoznao i ovaj segment medicinskog djelovanja, jer poslijeratni period statistički ukazuje na problematiku neuropsiholoških reakcija izazvanih stresom. Ova Klinika će zajedno sa centrima mentalnog zdravlja moći unaprijediti stručni i naučni aspekt djelatnosti kojima se mora pozabaviti društvo u cjelini. „ istakao je ministar zdravstva u Vladi Federacije BiH.

Zadovoljstvo preseljenjem, koje je osigurao UKC Tuzla, ali i Ministarstvo odbrane koje je Klinici ustupilo prostorije bivše kasarne „ Mirsad Fidahić „ u Solini izrazio je i Ministar odbrane BiH dr. Selmo Cikotić.

„ Klinika za psihijatriju je današnjim činom nagovjestila novu etapu svog rada, i spremna je nositi se sa izazovima i standardima koji u velikoj



mjeri nadmašuju granice kako Tuzle tako i cjele BiH. Zadovoljstvo mi je istaći da su u svemu ovome učestvovali i pripadnici drugih profesija i struktura iz cjele BiH. Ovim svečanim događajem simboliziramo još jednu pobjedu gdje su pripadnici odbrambenih struktura jako zadovoljni da ono što je u jednoj fazi služilo oružanim snagama sada dobija dimenziju široko primjenjive institucije koja će služiti u svrhu zdravlja „ – kazao je Ministar odbrane BiH dr. Selmo Cikotić.

Premijer Tuzlanskog kantona mr. sci. Enes Mujić presjecanjem vrpce proglasio je otvorenom Kliniku za psihijatriju UKC Tuzla.



„Klinika za psihijatriju predstavlja još jedan primjer dobre saradnje vojne i civilne vlasti za dobrobit BiH i njenih građana. Ovim činom učinjen je veliki korak u liječenju psihijatrijskih bolesnika” kazao je premijer Mujić.